

Rudy Lampe tabata orador invita na Universidad na Alemania



DI 14 pa 16 di februari ultimo a tuma lugar na Universidad di Mainz, Alemania, e encuentro academico internacional tocante: "E mundonan politico y cultural di Caribe, un laboratorio di globalisacion".

E profesornan di Universidad di Mainz cu ta dedica na investiga America Latina a tuma e iniciativa aki. Pa mas di un decada caba ta tuma lugar tur aña e encuentro aki.

Den pasado e topico tabata e pais Brasil of Colombia of un otro pais. Riba proposicion di Rudy Lampe a dicidi na 2012 pa dedica e encuentro aki n'e region di Caribe.

E motibo cu Rudy Lampe a trece dilanti tabata e hecho cu na augustus 2012 diferente pais di Caribe ingles a celebra nan 50 aniversario di independencia, manera Jamaica y Trinidad.

Pesey a analiza ampliamente durante e encuentro aki e situacion di Jamaica, hasta a presenta e pelicula di 40 aña pasa *The Harder They Come* (Jamaica, 1972).

Tambe a analiza e issue di independencia. Rudy Lampe a tene un discurso tocante e problematica di teritorionan no-independiente den Caribe.

Rudy Lampe a mostra riba e hecho cu Francia a duna derecho igual, cu Francesnan ta goza di dje, na tur ciudadano di islanan Frances, mientras cu Hulanda ta trata ciudadanonan di islanan BES como ciudadano di segunda categoria cu no tin derecho igual cu Hulandesnan na Hulanda. Riba portret por mira e momento cu Rudy Lampe ta duna su presentacion.

Durante e encuentro aki Rudy Lampe a haya oportunidad di combersa cu sr. Jorge Garcia, Vice-Consul di Republica Dominicana na Alemania. Y tambe Rudy Lampe por a intercambia di idea cu e famoso escritor Louis-Philippe Dalembert, considera un di e mihor escritornan contemporaneo di Haiti, kende a papia di e business cu a keda haci cu sufrimento di pobernan despues di e teremoto di februari 2010 y cu e placa di solidaridad pa gran parti no a yega p'e pueblo Haitiano.